



## Հովհաննես Հովհաննիսյան

### Կուզեի լինել կարկաչուն վտակ . . .

Կուզեի լինել կարկաչուն վտակ,  
Վճիտ ալիքը դրախտի բուրմունքով,  
Եվ առավոտյան ինչպես ցող հստակ,  
Երեսդ ոռոգել գոհար շիթերով:

Կուզեի լինել սոսի հովասուն,  
Համարձակ փոված կանաչ սաղարթով,  
Եվ միջօրեին այդ դեմքիդ սիրուն  
Հովանի լինել հեզիկ շրշյունով:

Կուզեի լինել ծաղկոցում բացված  
Քացրաբույր մի վարդ, երկնից արժանի,  
Եվ սիրո ժամին, խանդիցս արբած,  
Չարդարանք լինել կուրծքիդ գեղանի:

Եվ շող դառնալով գարնան արևի՝  
Կուզեի պայծառ աչերունդ վառվել,  
Կամ ինչպես քնքուշ ոսկեվառ գոտի  
Չքնաղ իրանիդ փաթավել, փարվել:

Լուսափայլ աստղիկ կուզեի դառնալ,  
Քաղցր մանկան պես ծիծաղն երեսին,  
Ինչպես աղամանդ շողշողել, ցոլալ,

Ով իմ թագուհի, քո բաց ճակատին:

Կուզեի լինել լուսին ամոթխած,  
Արծաթի փայլով մազերդ շոյել,  
Այտերդ գգվել, սիրուց բորբոքված՝  
Դողդոջ շրթունքիդ համբույրներ դրոշմել:

Կուզեի լինել սիրահար սոխակ  
Եվ ձեռիդ գերի, վանդակում փակված,  
Ականջիդ հնչել հրաշալի նվագ,  
Մեղմ օրոր ասել քո հոգուն գնայլված:

Եվ կախարդական տաճարում կանգնած  
Կուզեի տեսնել ես քեզ Անահիտ,  
Եվ երկրպագել, առաջիդ չոքած,  
Սուրբ գեղեցկության անմահ տիպարիդ: